


Թեան չը հասցրեց և նիզարը հետևեալ օրը յայտնեց, որ ինքը հրաման է ստացել չնոմից հեռանալու և մինչև Գը—նաւէնի քալը դեռ պանատան գործերը կը վարի քարտուղար կոմս զը Կաւրսելը: Նկարագրելով գործի ընթացքը, պապական օրգանը նկատում է, որ պահանջել օտար տէրութիւններին ուղարկած (նօտայի) բողոքագրի բովանդակութիւնը միանգամայն ասպօրինի է և հակասում է դիպլոմատիական բոլոր ընդունուած սովորութիւններին, որովհետև կօլլէկտիւ բողոքագրի մէջ փոփոխութիւններ անելը ոչ մի օրէնքով արգելուած չէ և պապի տեղապահին վերաբերեալ պարբերութեան մէջ, որը Ֆրանսիական կառավարութեան կողմից վերաւորական համարուեց, լրագիրն ընդհակառակն նկատում է պապական աթոռի կողմից առանձին ուշադրութիւն դէպի Ֆրանսիան, որովհետև Վատիկանը Ֆրանսիայի դէմ այն միջոցի չը դիմեց, ինչի որ կը դիմէր ուրիշների վերաբերութեամբ:



ԳՐԱԿԱՆ ՄԱՏԵՆԱԽՅՍԱԿԱՆ

ԺՈՂՈՎՐԴԱԿԱՆ ԽԱՂԵՐ

Ե.

ԽԱՂԵՐԻ ԶԱՐԳԱՅՈՒՄԸ

Կազմութեան նայելով՝ պէտք է տարբերել հիմնական խաղն իւր զարգացումից:

Հիմնական խաղերն են իսկապէս մի անգամից, մի բերմամբ յօրինուածները. զարգացած խաղերը ժամանակի ընթացքում առաջացած են հիմնականներից՝ իբրև տարրական մասերից:

Այս զարգացումը լինում է կցմամբ և աճմամբ:

Երկու հիմնական երկեակներ, որոնք իրարուց անկախ են և անջատ ևս երգուում են, կցուելով իրար՝ կազմում են մի քառեակ և միասին առնուում իբրև մի բաղա-

դրեալ ամբողջ խաղ, Օրինակ հետեւեալ քառեակը կըց-
մամբ կազմուած է.

Ծաղկէվանքու ձորէն եմ,

Մեծ բաղի խնձորէն եմ.

Գնան, գնան, հետիդ եմ,

Կարմիր խնձոր դօտիդ եմ:

Կցման համար իբրև հիմք ծառայում է կամ երկու
խաղի իմաստի իրար յարմարուիլը, կամ բացի այդ՝ և մի
բառ, որ երկու խաղի մէջ ևս կայ: Առաջին երկեակի
իմաստը, կամ նրա մէջ եղած մի բառը՝ երգչին յիշե-
ցնում է մի ուրիշ անկախ երկեակ, որի իմաստը բռնում
է առաջինին, և կամ որի մէջ նոյն բառը կայ, ինչ որ
առաջինի մէջ, և նա երկրորդ երկեակն երգում է առա-
ջինի հետ կցած իբրև մի խաղ, և այսպէս կցմամբ զար-
գացած խաղը մնում է յիշողութեան մէջ:

Այսպէս զարգացած խաղերը սակայն իմաստալից, սի-
րուն երգեր չեն, եթէ կցումը լինում է միայն մեքենա-
յաբար, այսինքն լոկ բառի պատճառով, առանց ուշա-
դուրսիւն դարձնելու երկեակների ներքին իմաստին: Քիչ
չի պատահում նաև որ երկու խաղի կցումը մի միայն
րոպէական քմահաճոյքից է առաջացած լինում:

Անվամբ զարգացման ժամանակ մի հիմնական եր-
կեակի կամ եռեակի վրայ, որ կարող է նաև մենակ, ան-
ջատ ասուել, աւելանում է մի կամ երկու տող ևս, և կաղ-
մում է մի նոր համեմատաբար աւելի մեծ խաղ՝ եռեակ
կամ քառեակ: Աւելացած կամ աճած մի տողը բնաւ, իսկ
երկու տողը սովորաբար մենակ չեն ասում, գոնէ այն
ձևով որ կան զարգացած խաղի մէջ: Այսպիսի զարգա-
ցումով է կազմուած, օրինակ, հետեւեալ քառեակը, որի
առաջին երկու տողն իբրև անկախ երկեակ ևս բանում է.

Ծաղկալանքը ծաղկեր ա.

Ծամեր գլխիս թաղկեր ա.

Խաբար սարէք իմ նանիս,—

Սէրը ինձի յաղթեր ա:

Ս.ճմամբ զարգացած խաղերը մեծ մասամբ աւելի իմաստալից են քան կցմամբ զարգացածները:

Խաղերի այս զարգացումը գտնուում ենք ստանաւորի ամեն մի տեսակի համար, տեսնենք շատ գործածական չափերից մի քանիսը:

Եօթն-վանկանի հիմնական երկեակները գրեթէ բոլորն սենին կցոււով և աւելի՛ աճուով կազմուած քառեակներ, այնպէս որ շատ քիչ այդպիսի երկեակներ կան, որ քառեակների մէջ չմտնեն: Եթէ կան էլ այդպիսիները, դրանց մի մասն ևս հաւաստեալ կարելի է ասել, որ կրկնակներ են, կամ սկզբնապէս կրկնակներ են եղել, կամ թէ նոր յօրինուած երկեակներ են ու դեռ միջոց չեն ունեցել զարգանալու, կամ թէ քառեակները մեզ յայտնի չեն: Անկախ երկեակների և նրանց քառեակների այս յարաբերութիւնն ինկատի ունենալով՝ մեր բազտատած հազարաւոր խաղերի համար կարելի է 7 վանկանի քառեակի զարգացումը մինչև անգամ շուռ տուած կերպով բացատրել և ասել թէ այս տեսակի խաղի հիմնական ձևն է քառեակը, որի առաջին երկու տողը բաժանուելով իրենց ամբողջից, սկսել են յետագայում իրրև անկախ երկեակներ բանել: Այս կերպով ևս անշուշտ առաջացած կլինին որոշ թուով երկեակներ, բայց խաղերի զարգացման ընդհանուր եղանակը վերևում բացատրածն է. այսինքն պարզից գէպի բարձր, երկեակներից եռեակներ և քառեակներ կազմուելը: Այս չի խանգարում սակայն ընդունել, որ շատ եռեակներ և քառեակներ ևս հիմնական են, այսինքն մի անգամից իրրև մի ամբողջութիւն են յօրինուած:

Իերենք մի քանի օրինակներ խաղերի այս զարգացումը բացայայտ անելու համար: Ազգագրական Հանգէսի VII-VIII գրքի մէջ (1901 թ.), եր. 439, բերուած են «սար, սար, սարերու գիւլն եմ, Լեռն Սամսոնի քուրն եմ» կրկնակի տակ ի միջի այլոց հետևեալ երկեակները.

1. Գնա՛, գնա՛, հետիլ կամ,

Կարմիր խնձոր գօտիլ կամ,

1. Բնան, զնան, կարը տես, Գաղ աղբիւրի սալը տես,
 Իմ հէր քեզ աղջկի չի աայ,—
 Գնան, զլիւրի ճարը տես:
 2. Ժամի դռնէն դուռ կը գաս,
 Արեւի պէս լուս կը տաս,
 Իմ իլղարը քեզ հետ ա,
 Դու իլղարից դուռ կը գաս:
 3. Բնան, զնան, կարը տես,
 Գաղ աղբիւրի սալը տես,
 Իմ հէր քեզ աղջկի չի աայ,—
 Գնան, զլիւրի ճարը տես:
 4. Սինամ սարեր մօտիկ ա,
 Զիւնը եկեր, գօտիկ ա,
 Մեռնեմ իմ եարիս բոյին,
 Տունս տանդ մօտիկ ա:
 5. Լուսնակը ցոլաց, զնաց,
 Գէմ առաւ ամպին մնաց,
 Սրտով սլայման չտուաւ,—
 Սրտիս դող ելաւ մնաց:

Արդ այս միւսնոյն երկեակների ածամբ զարգացած քառեակներ են հետեւեալները, որ մենք ունենք ձեռի տակ.

1. Բնան, զնան, հետիւղ եմ,
 Կարմիր լանձոր՝ գօտիդ եմ.
 Դու ինձ էտակդ չես թողնի,
 Որտեղ կը թաս՝ մօտիդ եմ:
2. Ժամի դռնէն դուռ կը գաս,
 Արեւի պէս լուս կը տաս,
 Իմ իլղարը քեզ հետ ա,
 Դու իլղարից դուռ կը գաս:

3. Բնան, զնան, կարը տես,
 Գաղ աղբիւրի սալը տես,
 Իմ հէր քեզ աղջկի չի աայ,—
 Գնան, զլիւրի ճարը տես:

Վարիանտներ.

- Գնան զլիւրի գալը տես,
 Արի սրտի հալը տես:
4. Սինամ սարեր մօտիկ ա,
 Զիւնը եկեր, գօտիկ ա,
 Մեռնեմ իմ եարիս բոյին,
 Տունս տանդ մօտիկ ա:
5. Լուսնակը ցոլաց, զնաց,
 Գէմ առաւ ամպին մնաց,
 Սրտով սլայման չտուաւ,—
 Սրտիս դող ելաւ մնաց:

Կցումով կազմուած 7-վանկանի քառեակներ համեմատաբար սակաւաթիւ են: Այսպիսիները մի արտաքին նշան ունին. այն է, կամ բոլոր չորս տողն ևս նոյնայանգ են, կամ թէ յաջորդաբար զուգայանգ են, այսինքն առաջին երկու տողը մի յանգ ունին, վերջին երկուսը մի ուրիշ յանգ, մինչդեռ ածումով զարգացած քառեակների 3-րդ տողն անյանգ է մնում: Այսպէս նոյնայանգ զարգացում ունի, օրինակ, վերևում դրած 4-րդ երկեակից հետևեալ քառեակը.

Սինամ սարերը մօտիկ,
Ձիւնը եկել է գօտիկ.
Աղջի գու ինչ խորոտիկ,
Արի մեր գուան մօտիկ:

Իսկ յաջորդաբար զուգայանգ զարգացում ունի վերևում դրած 1-ին երկեակից հետևեալ քառեակը.

Ծաղկէ վանքու ձորէն եմ,
Մեծ բաղի խնձորէն եմ,
Գնա՛, գնա՛ հեաիդ եմ,
Կարմիր խնձոր՝ գօտիդ եմ:

Սրա վարիանտն է հետևեալը, որի չորրորդ տողը սակայն աղդեցութիւն է կրած վերևում դրած աճամբ զարգացած 1-ին երգի վերջից.

Ես էս գեղի ձորէն եմ,
Խաս բախչի խնձորէն եմ.
Կարմիր խնձոր գօտիդ եմ,
Ուր որ երթաս հեաիդ եմ:

Այս քառեակի առաջին երկեակը կցւում է և ուրիշ երկեակների հետ, որոնցից են, օրինակ.

Ծաղկէ վանքայ ձորէն եմ,
Մեծ բաղի խնձորէն եմ.
Ուրիշ եար պիտի չառնեմ,
Հին եարի դարդով մեռնեմ:

Ես էս գեղի ձորէն եմ,
Մեծ բաղի խնձորէն եմ,

Խնձոր եղել հասել եմ,
Բլբլիլի հետ խօսել եմ:

Ես կեորիսի ձորէն եմ,
Մեծ բաղի խնձորէն եմ,
Խնձոր կծեմ, թոյ անեմ,
Միջի հարսը կու (կուլ) անեմ:

Կաղզուանի ձորէն եմ,
Մեծ բաղի խնձորէն եմ,
Գիար գիար կորել եմ,
Յարողմենէն ջորել եմ:

Սակաւ անգամ կը պատահի, որ կցուժով կազմուած քառեակները մէջ ընդ մէջ զուգայանգ լինին, այսինքն 1-ին և 3-րդ տողերն իրար հետ յանգ կազմեն, իսկ 2-րդ և 4-րդ տողերն իրար հետ: Յանգերի այս դասաւորութիւնը առաջ է գալիս միայն տողերի տեղափոխութիւնից. օրինակ.

Էս սարերում ձներակ,
Շաղաթաթախ արեգակ,
Արեգակին տէր աղբէր,
Շաքար մաղեմ՝ կեր, աղբէր:

Այս քառեակի երկրորդ երկեակի տողերը կցուելով մի ուրիշ երկեակի հետ, մէջ ընդ մէջ են ընկել.

Արեգակին տէր աղբէր,
Այ շաղաթաթախ աղբէր,
Շաքար մաղեմ՝ կեր, աղբէր,
Ջանս քեզ մատաղ, աղբէր:

Եօթն-վանկանի եռեակներ ընդհանրապէս շատ քիչ կան, իսկ երկեակից զարգացած եռեակներ աւելի ևս սակաւ: Մեր ձեռքի տակ ունեցածների մեծ մասը հիմնական եռեակներ են: Կան և եռեակներ, որոնք քառեակներից են առաջացած՝ անյանգ 3-րդ տողի գուրս ընկնելով:

Ե. Լալայեանի «Ջաւախքի բուրմունք» եր. 20. գըտնում ենք հետևեալ երկեակը՝ գրուած ուրիշ խաղի սկզբում.

Առաւօտուն թոնդիր մուխ,
ձերմակ լաշիկ, զլխուն թուխ

Սոյն խաղն իբրև եռեակ զարգացած գտնում ենք
Ազգագրակ. Հանդէս. VII—VIII գիրք, եր. 444.

Առաւօտուն թոնդիր մուխ,
Կախիր հաշմաղ, թորկիր պուխ,
Աժէր Մաշն ու Բուլանուխ:

Իսկ սրա վարիանտն է Լալայեանի «Ջաւախքի բուր-
մունքի» մէջ, եր. 22.

Առաւօտուն թոնդրին մուխ,
Ոչուին բալակ, ունքուին թուխ,
Չեմ ի տայ Մուշ Բուլանուխ:

Նոյն գրքի մէջ եր. 21 սրա վարիանտն է, միայն
ութ վանկանի ոտանաւորով.

Գունէն անցայ, թնդիրն էր ծուխ,
Աչքեր բալակ, ունքերը թուխ.
Մեռնեմ քեզի սուրբ Բուլանուխ:

Մենք ունինք և հետեւեալ վարիանտը.

Առաւօտուն թոնիրն էր մուխ,
Կլտր աչքեր, ընքեր թուխ.
Աժէր Մուշն ու Բուլանուխ:

Սրա վարիանտն է և Մխիթարեանի «Տաղեր ու խա-
ղեր» եր. 243.

Թունդիր վառէ, էղեր է մուխ,
Կապէ փուշին, թորկեր է պուխ.
Ունքեր կամար, աչքերն է թուխ:

Սոյն այս խաղը գտնում ենք և իբր քառեակ զար-
գացած. Շէրէնց, «Վանայ սաղ», Բ. եր. 29.

Առաւօտուն թոնիր մուխ.
Աչքեր բալաք, ընքուեր թուխ.
Արի երթանք Մուշ Բուլանուխ,
Յրուի մեր սրտի քէն ու սխ:

Նոյնն իբրև քառեակ և Սրուանձտեան՝ «Համով-Հոստով» էր. 320.

Սասման կելնէր բարակ ծուխ,

Նարիկ մ'ուռնէր Բուլանուխ.

Չարկեց մախնան, Թարկեց պուխ,

Երես կարմիր, աչքեր թուխ:

Նոյնն և Ազգադր, Հանդ. VII-VIII էր. 442.

Նար մ'ուռնիմ Բուլանուխ,

Հազեր ճուպէն, թորկեր պուխ.

Ճօպլակ պաժ, բարակ մատներ,

Աչքեր բալաք, բնքեր թուխ:

Մենք ունինք և հետևեալ քառեակը.

Առաւօտուն թոնիր մուխ,

Նաչմաղ զարկիր, թորկիր պուխ.

Կլոր աչքեր, բնքեր թուխ:

Աժէր Մուչն ու Բուլանուխ:

Այս մի և նոյն խաղի մի երկեակ գտնում ենք և Մեղրակեան «Բնար Մշեցոց և Վանեցոց», էր. 31.

Աղջիկ, մի գար, մեր տուն ծուխ ի,

Գիլբար, մի գար, մեր տուն ծուխ ի,

Կարմիր երես, աչքեր թուխ ի:

Այստեղ խաղն ըստ երևութին միայն եռատող է, իրօք դա երկեակ է, որովհետև երկրորդ տողը «Գիլբար, մի գար, մեր տուն ծուխ ի», մի առանձին տեսակի կրկնակ է, ինչպէս նոյնը գտնում ենք նոյն տեղում և ուրիշ խաղերի համար, ինչպէս են՝

Աղջիկ, մի գար, մեր կալերով:

Գիլբար, մի գար մեր կալերով:

Գիլբարի ձին էր նալերով: Եւ այլն:

Այսպէս, տեսնում ենք երկեակից եռեակներ և քառեակներ են զարգանում բազմազան ձևերով: Մենք բացատրութիւնների մէջ մտնելու փոխանակ՝ աւելի լաւ ենք համարում մի օրինակ էլ բերել թէ ինչպէս եռեակից մի

տող աւելանալով կազմուած են քառեակներ:
 Լալայեանի «Զաւախքի բուրմունք» եր. 22. կայ հե-
 տեեալ եռեակը.

Առաւօտուն թոնդրին բոց,
 Արի էղնինք գիրկ ու ծոց,
 Ար գայ խամբի դարդ ու խոց:

Այս եռեակն իբրև քառեակ, մի տող աւելացած,
 գտնուած ենք Շէրէնցի «Վանայ սաղ» Բ. եր. 29.

Առաւօտուն թոնիր բոց,
 Արի մանենք իրար ծոց,
 Պագ մը ես սամ, պագ մը դու,
 Յրուի մեր դարդ ու խոց:

Նոյնն ուրիշ ձևով Ազգ. Հանդ. VII-VIII եր. 444.

Առաւօտուն թոնիր բոց,
 Կախիր ետեմաղ, քորկիր պոչ,
 Արի էնենք գիրք ու ծոց,
 Բալքիմ խմբի դարդ ու խոց:

Ութ-վանկանի խաղերի զարգացման համար ևս բե-
 րենք մի երկու օրինակ:

Լալայեանի Զաւ. Բուրմ. եր. 19. «Կայնէ, ֆիդան
 բոյիդ զուրբան» կրկնակի տակ կայ.

Էլեր ես, կերթաս կը մարագ,
 Քեերդ էրկան, մէջքդ բարակ,
 Կերածդ ե միտս մեղրով կարագ:

Նոյնը Սեդրակ. Բն. Մշ. և Վան. եր. 23. «Աղջիկ
 եար անենք» ևլն. կրկնակի տակ.

Դու էլեր ես կերթաս մարագ,
 Վիզդ երկէն, մէջքդ բարակ.
 Ինչ որ նագնես՝ քե մուքարագ:

Այս երկու եռեակի մէջ հաստատուն հիմնական
 մասն է առաջին երկու տողը. իսկ Յ-րդ տողը երկուսի
 մէջ ևս նոր աւելացած ու տարբեր են: Մեր ժողովածուի
 մէջ այս երկու աճած տողը միասին կան, որով նոյն խաղը
 քառեակ է դարձած.

Դու ելեր ես կերթաս մարագ,
 Վիզդ երկէն, մէջքդ բարակ.
 Կերածդ մեղըր ու կարագ,
 Հազիդ հալաւ քեզ բումբարակ:

Սեդրակեան Քն. Մշ. և Վան. եր. 30. «Արի եւր, արի» և լն. կրկնակի տակ դանոււմ ենք նոյն իբրև եռեակ, միայն վերջին երկեակի հետ առաջին երկեակից մի տող միացած.

Դու ելեր ես կերթաս մարագ,
 Քու ուտելուն մեղր ու կարագ,
 Հագնելուս քե բուն բարակ:

Նոյնը Սրուանձտ. «Մանանայ» եր. 292. իբրև վիճակի երգ.

Ելեր ես կերթաս ուխտ վարագ,
 Քո ուտելիք սեր ու կարագ.
 Ինչ հողեր ես քե մուրարէք:

Նոյնը Շէրենց «Վանայ Սագ» Ա. եր. 97. դարձեալ վիճակի երգ, միայն վերջի երկու տողը շուռ տուած.

Ելեր ես կերթաս վարագ,
 Ինչ ես հագե՛ քե մուրարագ.
 Քո կերածն է սեր ու կարագ:

Սեդրակ. Քն. Մշ. և Վան. եր. 31. գանոււմ ենք հետևեալ երկեակը իւր միջի կրկնակով.

Արի երթանք հորթկայ խտտիկ,
 Դիւրար, երթանք հորթկայ խտտիկ.
 Տեսնենք վի՛ր հարն ա խորտտիկ:

Նոյնը Միանսարեան «Քնար Հայկական», եր. 177. գանոււմ ենք զարգացած իբրև քառեակ.

Մեր տունն ձեր տունն մօտիկ մօտիկ,
 Դու կասիլ ես կարմիր դօտիկ.
 Երթանք քաղենք կանաչ խտտիկ,
 Տեսնենք վի՛ր հարն ա խորտտիկ:

Նոյնն ուրիշ ձևով զարգացած. Ազգ. Հանդ. VΠ-VIII
դիրք. եր. 443.

Մեր տուն ձեր տուն մօտիկ մօտիկ,
Երթանք քաղենք հորթկան խոտիկ,
Բերենք դենք մարին մօտիկ,
Տեսնենք վեր եարն ա խորոտիկ:

Նոյնը դարձեալ ուրիշ ձևով զարգացած Շէրենց Վան,
Սազ. Բ. եր. 43.

Մեր տուն ձեր տուն մօտիկ մօտիկ,
Երթանք քաղենք որթկան խոտիկ,
Իմ հար քանց քոն շատ խորոտիկ,
Եարոջս մեռնեմ՝ անուն Վարդիկ:

Պատահում է երբեմն, որ երգչի քմահամոյքով մի
կամ աւելի տող ևս աւելանում է բառեակի վրայ, որով
երգը խաղի սովորական ձևից դուրս է դալիս: Օրինակ՝
Քնար Հայկական եր. 177 կայ հետևեալը.

Մեր տան ետև քառսուն կարաս,
Քառսուն կարսի գինին էր խաս,
Ոսկէ գիւգիւմ՝ արծըթէ թաս.
Ամեն թասին սլազիկ մը տաս:

Նոյնը մի տող աւելացած գտնում՝ նոյն դրքի մէջ
եր. 178.

Մեր դռան յետև տուն մի կարաս,
Չեր դռան յետև տուն մի կարաս,
Ամեն կարսի գինին էր խաս,
Ոսկի գիւգիւմ՝ էրծաթէ թաս,
Ամեն թասին սլազ մը կուտաս:

Այս մի և նոյն երգը գտնում ենք Ազգ. Հանդէս
VΠ-VIII եր. 443. աւելի ևս ընդարձակուած.

Մեր դռան առաջ քառսուն կարաս,
Չեր դռան առաջ քառսուն կարաս.
Քառսուն կարսի գինին է խաս,
Ամէկ կարսէն մէկ թաս ի տաս.

Ամէկ թասին մէկ պագ ի տաս.
Թէ դու չի տաս, դու գօտենաս:

Մենք ունինք մի վարիանս ևս, որի մէջ 3-րդ տողից
յետոյ կայ ձևակի դիւղիւմ արծաթէ թասս, որ այստեղ
պակասում է և մինչև անգամ մի 8-րդ տող վերջից.
«գօտենաս ու որբէքնաս»:

Ծիշտ այսպիսի աւելցուկ տողեր ունի և հետևեալ
խաղը Ազգ. Հանդէս VII-VIII եր. 442.

Ծառի տակի պաղ աղբիւր,
Արծաթէ թաս, ոսկի ջուր.
Ես կը վառիմ քո սիրուն.
Թաս մի կուղեմ երկուս տուր.
Թէ որ չի տաս՝ գօտենաս.
Գօտենաս որբէքնաս:

Այս խաղի հիմնական երկեակը դանում ենք Սրուանձտ.
Համ. Հոտ. եր. 327.

Ծառի տակի պաղ աղբիւր,
Մէկ դու խմէ՛, մէկ ձի սուր:

Իսկ զարգացած ձեերից է մեր ժողովածուի մէջ.

Հով ծառի տակ պաղ աղբիւր.
Արծաթէ թաս, ոսկէ ջուր.
Մին ես խմեմ, մինը դու.
Անուշ կենանք ես ու դու:

Վերջին տողն ունի և հետևեալ ձեր. «Իատաստանին
ջուհար տնու»:

Բերենք մի քանի օրինակ և ճիւղ կամ ճասն-վան-
կանի խաղերի զարգացումից.

Սրուանձտ. Համով-Հոտով. եր. 328 կայ.

Էս օր ինչ օր է, ուրբաթ ու պաս է.
Աղջիկ քո գլուխ արծաթէ թաս է.
Թորած վարդապետ կասէ՛՝ չհաս է:

Նոյնը Վանայ Սաղ. Ա. 39.

Էս օր ինչ օր ի, ուրբաթ ու պաս ի.
Աղջիկ, քո գլուխ արծաթէ թաս ի.
Տղա՛յ, քո գլուխ սրմալու ֆասս ի.
Խորած վարդապետ կասի չհասի:

Համով-Հոտով եր. 328 կայ.

Երկինքն էր ամպեր, կուզէր մարմար ձուն.
Կըհալէր, կաթէր վեր մալուլ մարդուն.
Աստուած աւերէր դամազ մարդու տուն:

Նոյնը Խաղեր ու Տաղեր եր. 121.

Երկինքն ի ամպեր, կուզար մարմար ձուն.
Կուզար կը թափէր վեր մալուլ մարդուն.
Աստուած աւիրէր դամազ մարդու տուն.
Չեքող որ իմ ետ մէկօր գեւ մե սուն:

Նոյնը Վանայ Սաղ Ա. 39.

Երկինքն էր ամպեր, կուզէր մարմար ձուն.
Կուզէր կը թափէր վեր մալուլ մարդուն.
Մեկ ե՞ս եմ մալուլ, քե աշխարհ բիթուն.
Իմ ետոզ սիրուն մնամ երեւուն:

Մրուանձտ. Համով Հոտով, եր. 328. «Պարերգ» վեր-
նագրի տակ «գտնում» ենք մի շարք իրարուց անկախ
խաղեր, որոնցից մէկն է.

Երէկ հէվարին
Ոչխար վեր բերին,
Թըւանքով զարկին,
Բըբինգար արին:

Այս քառեակի վարիանտն իբրև 10 վանկանի եր-
կեակ առնուած՝ գտնում ենք Վանայ Սաղ. Ա. 37. մի
ուրիշ նման երկեակի հետ միացած իբրև պանդխտի երգ.

Երէկ էվարին վեր Սասմայ քարին,
Թըւանքով զարկին բըբինգար արին,
Խարրիկ մ' տարէք իմ նազու եարին,
Թէ չէ կը գրեմ մէջ էն դաւթարին:

Եթէ այսպէս շարունակելու լինինք, խիստ շատ
օրինակներ կարող ենք բերել, որոնց մէջ պարզ երևում

է թէ ինչպէս երկեակներ, որոնք խաղերի տարրական ձևն են, զարգանալով դառնում են համեմատաբար աւելի մեծ խաղեր, եռեակներ և քառեակներ: Յաճախ ի հարկէ դժուար է որոշել թէ արդեօք որն է հիմնական երկեակը, և թէ արդեօք հիմնական երկեակից է եռեակ ու քառեակ զարգացած, թէ ընդհակառակն: Բայց այս դժուար է միայն նիւթի պակասութեան պատճառով: Եթէ կարեւոր նիւթը ձեռքի տակ ունենայ մարդ և համբերութիւն ունենայ մանր մանր աշխատանք անելու, կարելի է է ասել թէ միշտ կ'որոշուին խաղերի հիմնական ձևերն իրենց զարգացումներից:

Խնդիրն այստեղ ի հարկէ այն չէր, որ մենք որոշէինք այս կամ այն խաղի հիմնական ձևն իւր զարգացումից, այլ ցոյց տալ թէ ինչպէս պարզ խաղերից կազմում են բարդ խաղեր: Եւ եթէ մենք մի փոքր աւելի օրինակներ բերինք, այդ միայն նրա համար, որ մեր ընթերցողներին մի մասի ծանօթութիւնը մեր ժողովրդական խաղերին՝ շատ աւելի չէ քան «Մուրճ» ամսագրի դաւառագիտուն մասննախօսին, որ՝ եթէ որ և է խաղի այս կամ այն ձևը իրեն յայտնի չէ, համարում է «տարքովի», «թխովի», «չինձու», «աղճատուած», կամ «ոչ ժողովրդական» և այլն: Այդպիսիներին կարճ խօսքով բան հասկացնելը դժուար է:

Բայց մենք դառնանք մեր երգերի զարգացմանը:

(Կը շարունակուի)

Մ. Ս. Բեդեան.

ՇԻՐԱԿԻ ԳԻՒՂԱԿԱՆ ԿԵԱՆՔԻՅ

Վահրամ իշխանի վրայ մի կարմիր, սիրուն քար է ձգած և վրան գրուած է.— Սոս ամփոփին նշխարք Վահրամայ իշխանաց իշխանի շայց մեծաց, ի ցեղէ Պահլաւունի, որ նահատա-